

L'art dad ignorar quai ch'ins na sa betg duvrar

Las novas tecnologias d'infurmaziun en scola

■ (anr/fa) **A chaschun da la dieta annuala da la magistraglia grischuna LEGR ha referi il perit Hanspeter Fülle- mann davart il diever dals meds digi- tals per la scola. Ils scolars duessan enconuscher er ils privels da quests meds.** Mesemna han salvà a Landquart las differentas uniuns da la magistraglia grischuna lur dieta annuala. En il Plan- tahof s'han radunandas las mussadras, las magistras ed ils magisters primars e las persunas spezializadas per la pedagogia curativa. En il Forum im Ried è stada la delegada da las magistras d'economia da chasa e da lavur manuala sco era la radunanza generala dal staglim secundar 1 (SEC 1 GR). Il president da questa uniun *Mario Wasescha* ha salidà suenter la radunanza il referent *Hanspeter Fülle- mann* da la Scol'auta pedagogica da la Turgovia a Kreuzlingen. El è pedagog spezialisà per las novas tecnologias d'infurmaziun ch'ins po duvrar era per l'in- strucziun. A tadlar ses referat èn vegnids era numerusas scolastas e scolasts da las autras uniuns. Preschents eran era cusse-

glier guvernativ *Martin Jäger* e *Dany Bazzell*, il manader da la scola populara, scolina e scolaziun speziala dal Grischun.

«Preservar als juvenils dad esser memia naivs»

A l'avis dal referent èsi per dus motivs necessari che magistras e magisters s'oc- cupian da las novas tecnologias d'infur- maziun: «Sco emprim chattan ins en l'internet enorm bler savair ch'ins po utilizar per l'instrucziun», ha ditg Fülle- mann, «da l'autra vart èsi era da guar- dar nua ch'èn ils privels per ils uffants e juvenils.» El ha menziunà ch'ìls juve- nils ch'èn creschids si cun il computer e l'internet vegnian numnads ils «digital natives»: «Igl exista il privel ch'els sajan 'digital naives' e tradeschan en las raits socialas sco facebook u twitter memia bler dad els sez, infurmaziuns ch'igl è suenter fitg difficil da stizzar or da l'in- ternet.» Per esser capabel da far quai èsi necessari che la magistraglia enconu- schia e sappia lavurar cun ils meds digi- tals.

«Senza emblidar ils meds d'instrucziun tradiziunals»

En vista a las enormas quantitads d'infur- maziuns ch'ins chatta en l'internet ha ditg il perit Füllemann che l'art saja dad igno- rar quai ch'ins na sappia betg duvrar e sa deditgar a l'auter, «senza perder temp cun vulair leger tras tut». La finamira da l'in- strucziun è tenor el che las scolaras ed ils scolars sappian lavurar cun las novas tecnologias d'infurmaziun da maniera cumpetenta. «Quai premetta però ch'era la magistraglia possedia quest savair», ha repetì il referent. El ha cusseglia da cu- menzar cun lavurs simplas cun las novas tecnologias d'infurmaziun e pir alura sa metter a las lavurs pli complexas. Ch'i saja enpli er indispensabel per las magistras ed ils magisters da s'occupar da las raits so- cialas en l'internet sco p. ex. il facebook. Cuntraproductiv èsi tenor el da vulair scu- mandar tut a las scolaras ed als scolars. Hanspeter Füllemann ha dentant era ditg ch'ins na duessia betg emblidar ils meds tradiziunals, ils cudeschs, che quels sajan anc adina la basa da l'instrucziun.



Mario Wasescha, il president dal staglim secundar 1, surdat il pled al referent Hanspeter Füllemann.